

## **Акафист святым равноапостольным Мефодию и Кириллу, учителем словенским**

### **Кондак 1**

Избранныи от Царя сил Господа Иисуса во апостоли языком словенским, Мефодие и Кирилле богомудрии, песньми восхваляем вас, предстателей наших; вы же, яко имущии дерзновение ко Господу, от всяких нас напастей предстательством вашим свободите, зовущих: Радуйтесь, Мефодие и Кирилле, язык словенских апостоли и богомудрии учителяие.

### **Икос 1**

Ангелов Творец и Господь сил предустави вас быти просветители языком словенским; того ради и благодать Его бе с вами, ограждаючи и укрепляючи вас во вся дни живота вашего юже помощницу себе имуще, славу Божию во градех и пустынях делы и словесы вещали есте всем. Темже и мы, яко отрасль язык, верою Христовою от вас просвещенных, воспеваем вам, глаголюще: Радуйтесь, радости Евангельския благовестителие; Радуйтесь, чудодейственныя благодати носителие. Радуйтесь, скорби многи за имя Господне приявшии; Радуйтесь, прелести мира сего отвергшии. Радуйтесь, издетска Богом благословеннии; Радуйтесь, венцы исповедническими от Него украшеннии. Радуйтесь, яко славу человеческую презревше, в пустыни Господа искали есте; Радуйтесь, яко волю Его сильным мира сего со многим дерзновением благовестили есте. Радуйтесь, сих ради от Владыки всех в рай светел приятии; Радуйтесь, пред Ним наши теплии ходатаи. Радуйтесь, яко вашими молитвами вере нашей утверждение имамы; Радуйтесь, яко предстательством вашим ересей одоление стяжахом. Радуйтесь, Мефодие и Кирилле, язык словенских апостоли и богомудрии учителяие.

### **Кондак 2**

Видев святой Кирилл, еще сый отрок, в нощи видение, яко избрати ему Софию деву сестру себе, родителем сия поведи. Тии же, разумевше зде волю Божию, во еже быти чаду их премудрости служителю, вельми о научении и наказании его пекошася, зряще же скорое его в разуме преспеяние, пояху Богу: Аллилуиа.

### **Икос 2**

Разум недоразуменный и естество сущих испытуй, Кирилл в премудрости паче сверстник своих преспеваше и, еще отрок сый, прославися, и в палатех царских во образ благий юному сыну цареву водворен бе. Но, богатство и славу земную презрев и еже едино на

потребу спасения ища, в пустыню вселйся, да пощеньми и молитвами безстрастия достигнет. Сих же ради и Мефодий, воевода уже сый, отыде на гору Олимп, идеже яко иннок Господу служаше. Темже научимся и мы искушения мира презирати, наипаче же Христу Богу угождати, угодники Его воспевающе сице: Радуйтесь, славою, яже от человек, не прельстившиися; Радуйтесь, пустынножительству крепче прилепившиися. Радуйтесь, яко Господь просвещал вы есть в сонних и видениях; Радуйтесь, яко и мудрость человеческая пособствова вам во спасение. Радуйтесь, яко Слово Божие и святых отец писания паче философии возлюбили есте; Радуйтесь, яко Господня закона не слышателіе забытливи бысте, но творцы. Радуйтесь, яко козни диавольския, на пустынножители находящия, победили есте; Радуйтесь, яко сих ради дадеся вам власть над искушеньми и страстьми. Радуйтесь, яко подвизи ваша стяжаша вам венец живота; Радуйтесь, яко и ныне подвижником и постником пособицы есте. Радуйтесь, всем грешным пред Богом блазии заступницы; Радуйтесь, душ наших от лести сатанинския защитницы. Радуйтесь, Мефодие и Кирилле, язык Словенских апостоли и богомудрии учителяе.

### **Кондак 3**

Сила молений царевых понуди святаго Кирилла пустыню оставити служения ради пастырска в Цареграде, идеже славу Божию ученьми и дела вещаше и ересь иконоборную посрамляше. Темже и нас, о святой отче, в православии утверди, отпадшия же от истинныя веры единоплеменники наша к единоверию возврати, да вси словене едиными усты вопиют о просветителех своих Христу Богу: Аллилуиа.

### **Икос 3**

Имея премудрости силу, потекл еси, святой Кирилле, с монахом Георгием ко агаряном стязания ради о вере, и от святаго Григория Богослова духовно просвещаем, премудрость тайны Святыя Троицы во мнозех подобиих показал еси, посрамляя нечестивых силою словес твоих. Тии же, завистию распаляеми, восхотеша зелием погубити тя, егоже вкушь, не претерпел еси вреда, но здрав прибыл еси ко святому Мефодию во обитель и с ним купно иноческия труды паки подъял еси, и просветися пустыня подвигов ваших светом. Темже и нас предстательством вашим просветите, любовию поющих: Радуйтесь, доброгласнии славы Божия кимвали; Радуйтесь, Церкви Его твердии столпи. Радуйтесь, тайну Троицы в подобиих проповедавшии; Радуйтесь, воплощение Бога Слова пред сарацины нетрепетно исповедавшии. Радуйтесь, еллинов и иудеев и варваров просветителие; Радуйтесь, Триединого Божества благовестителие. Радуйтесь, яко вами посрамися лесь иконоборная; Радуйтесь, яко от вас увядает нечестие агарянское. Радуйтесь, яко истину Христову

неведущии имут вы учителя; Радуйтесь, яко искушаемии сомнением обретают вы в вере наставители. Радуйтесь, яко прогневавшии Господа имут вас пред Ним предстатели; Радуйтесь, яко угрождающии Ему имеют вы покровители. Радуйтесь, Мефодие и Кирилле, язык словенских апостоли и богомудрии учителяе.

#### **Кондак 4**

Бурю различных бед и зол, на языки словенския находящую, предстательством вашим разорите, преподобнии, яко служений многих жребий прияли есте, и во апостольстем бо лице, и в преподобных сонме, и во учителей чести, и во исповедников воинстве вчини вас Господь, да вси словене вопиют Ему о вас: Аллилуиа.

#### **Икос 4**

Слыша царь Козареск, яко истинная вера в стране еллинов исповедуется, испроси себе от царя Византийска учителей православия. Сей же умоли святых Кирилла и Мефодия оставити пустыню и плыти понтом Евксинским к козаром. К нимже пришедше, святая братия обратиша сердца их ко Христу и спасительное Крещение преподаша им. С темиже и мы прославим равноапостольных братьий, глаголюще: Радуйтесь, не убоявшиися снити ко варваром с Евангельским благовестием; Радуйтесь, озарившии море славным своим тамо шествием. Радуйтесь, яко святаго апостола Климента нетленныя мощи от вас обреты быша; Радуйтесь, яко того помощию нечестие козарско от вас посрамися. Радуйтесь, яко свет Христов стране полуночной преподали есте; Радуйтесь, яко праведности ваша слава во вся концы земли распростресе. Радуйтесь, Церкви Христовы предстательство и утверждение; Радуйтесь, от ересей и расколов наше крепкое ограждение. Радуйтесь, от агарян и иудей приявшии за Христа укорение; Радуйтесь, от мощей мученика снискавшии благословение. Радуйтесь, почитанию угодников благим образом жития вашего нас научившии; Радуйтесь, и сами, яко угодницы Божии, от всех православных исповедуемии. Радуйтесь, Мефодие и Кирилле, язык словенских апостоли и богомудрии учителяе.

#### **Кондак 5**

Боготечная звезда явися вам святаго Климета нетленное тело, всплыв на волнах понта Евксинскаго, на егоже дне от семисот лет сокрыто лежаше. Вам же явил есть творяй чудеса Господь в знамение трудов апостольских и скорбей исповеднических ваших. Еже разу-мевше, возописте Богу: Аллилуиа.

### **Икос 5**

Видевше святая братия соплеменные им словены истинную веру исповедующа, слово же Божие своим им языком чести не ведуща, потщашася Божественныя книги на язык словенск преллагати, да вси людие на сроднем им языке единого всех Господа прославят; темже и мы прославим Господа о святителях наших, имже возопиим: Радуйтесь, подателие Христова света народом иноплеменным; Радуйтесь, просветителие словен, вам соплеменных. Радуйтесь, делателие винограда Христова; Радуйтесь, пастырие добрии стада Иисусова. Радуйтесь, слова Божия вернии толковницы; Радуйтесь, наши блазии и кротцыи учителяе. Радуйтесь, мир Христов с собою всюду пронесшии; Радуйтесь, мир весь светом учений ваших просветившии. Радуйтесь, и ныне приемлющии моления нас грешных; Радуйтесь, и ныне посылающии утешение печальным. Радуйтесь, всех, за истину угнетенных, прибежище; Радуйтесь, Духа Святаго пречестное жилище. Радуйтесь, Мефодие и Кирилле, язык словенских апостоли и богомудрии учителяе.

### **Кондак 6**

Проповедницы богоноснии бывше, святая братия во страны словенския идоша просветити новокрещенныя люди Христовым учением. Тии же, узревше вас, яко ангелов светлых, спасение благовестити грядущих, яко пастырей добрых, душу свою за овцы полагающих, возопиша прославляющему святых Своя Богу: Аллилуиа.

### **Икос 6**

Возсиявшей в Моравии заре истинныя веры, испросиша князи словенстии от царя Византийскаго во страны своя учителя и утвердители людем. Сих же моления услышавше, святии Мефодий и Кирилл во страны словенския подвигошася, проповедающе Евангелие Царствия Божия словенским народом. Еже уведевше, возрадовашася словене и, отвсюду ко святым братьям притекающе, закону Божию поучахуся, Господа славяще и просветители своя хваляще, с нимиже и мы вкупе воспоим Мефодия и Кирилла, взывающе: Радуйтесь, апостоли наши богоглаголиви; Радуйтесь, учителяе наши благодатнии. Радуйтесь, исповедницы наши, многое дерзновение имущии; Радуйтесь, пустынницы наши преподобнии. Радуйтесь, молитвенницы наши теплии; Радуйтесь, чудотворцы наши светлии. Радуйтесь, славити Бога всеми языки завещавшии; Радуйтесь, триязычную ересь добльственно обличившии. Радуйтесь, словеном в год скорби утешение; Радуйтесь, во обстояниих тяжких надеждо их и заступление. Радуйтесь, приносящии ко Владыце всех наш покаянныя молитвы; Радуйтесь, и сами о нас к Нему выну молящиися. Радуйтесь,

Мефодие и Кирилле, язык словенских апостоли и богомудрии учителяе.

### **Кондак 7**

Хотяще изгнати вы из стран словенских, священницы латинстии оклеветаша вы пред епископом Римским. Егда же сей с мощми святаго Климента пришедших вас узре и правоверие ваше и доброе житие уведе, абие посрами клеветавшия на вы корыстолюбцы, вас же именем Христовым благослови, поя Богу: Аллилуиа.

### **Икос 7**

Дивнии апостоли явишася святая братия, не имуще покоя в трудах своих: святой бо Кирилл от подвигов многих изнемог, скоро по пришествии в Рим живот свой сконча. Святой же Мефодий ревностию брата своего укреплен и от папы Адриана благодатию архиерейскою почтен, к подвигом новым в Моравию и Паннонию возвратися, идеже труды множайшия понесе; имже дивящеся, воспоим святую братию, зовуще: Радуйтесь, добрии слуги Христовы; Радуйтесь, яко даже до смерти верни истине пребыли есте. Радуйтесь, Господеви, а не человеком угождавшии; Радуйтесь, имене Его ради поношения от человек приявшии. Радуйтесь, чрез все житие на ниве Господней потрудившиися; Радуйтесь, и по смерти от паствы своя любовьию не отлучившиися. Радуйтесь, свет миру и соль земли бывшии; Радуйтесь, яко светильник, горяй во тьме, языком светившии. Радуйтесь, яко град верху горы, от верных и неверных не утайвыйся; Радуйтесь, заповеди Господни сотворшии и иных научившии. Радуйтесь, сего ради велии во Царствии Божием нареченнии; Радуйтесь, на земли в Церкви Господней прославленнии. Радуйтесь, Мефодие и Кирилле, язык словенских апостоли и богомудрии учителяе.

### **Кондак 8**

Странно преставление святаго Кирилла всем явися, не о жизни бо временней помышляше, но Господа о новопросвещенных им церквах моляше, да утвердит я в Православии и от триязычныя ереси и прочих напастей и бед оградит я, святаго же Мефодия увещаваше, глаголя: «Се, брате, супруга волон бяхове, едину бразду тяжуща, и аз на лесе падаю, течение скончав; ты же любиши святую гору вельми, не мози убо горы ради оставити учения языков словенских». Темже, толицей ревности святых братий дивящеся, воспоим Богу: Аллилуиа.

### **Икос 8**

Весь предан быв душею же и телом заветам брата своего, святой Мефодий не убоясь прощений княжеских, ни клевет от иереев

латинских, ни заточения темнична, но вся сия, яко доблий воин Христов, претерпевая, не преста языки словенския и паству свою добре правити и просвещати, дбндеже в старости опочи и к святому Кириллу во блаженную обитель райскую преставися. К ним же мы воспоим тепле: Радуйтесь, венцем терпения на земли венчаннии; Радуйтесь, светом вечным на небеси осияннии. Радуйтесь, подвижницы, нищии духом, яко ваше есть Царствие Небесное; Радуйтесь, плакавшии много, яко обильно утешистесь. Радуйтесь, кротцыи, яко наследисте во Христе земли словенския; Радуйтесь, алкавшии и жаждавшии правды, яко насытитесь в селениих небесных. Радуйтесь, милостивии, яко не сами токмо помиловани есте, но и иным милости от Бога ходатаи бысте; Радуйтесь, чистии сердцем, яко днесь Бога лицом к лицу зрите. Радуйтесь, миротворцы человеком бывшии, яко сынове Божии нарекошестесь; Радуйтесь, изгнаннии правды ради, яко ваше есть Царствие Божие. Радуйтесь, яко возненавидени бысте от человек и гонение и клеветы прияли бысте Христа ради; Радуйтесь и веселитесь, яко мзда ваша многа на небесех. Радуйтесь, Мефодие и Кирилле, язык словенских апостоли и богомудрии учителяе.

### **Кондак 9**

Всякия козни, на страны словенския находящия, бодро разорjali есте, преподобнии, темже и ныне не оставите нас, смиренных и грешных, но вся словены в Православии и единомыслии утвердите, да вси едиными усты и единым сердцем вопиют прославившему вас Богу: Аллилуиа.

### **Икос 9**

Вития многовещанная, яко рыбы безгласны, зрим о вас, преподобнии, недоумеют бо, како и в пустыни духом витали есте, и посреде человек неусыпными подвиги подвижастесь. Мы же, радующеся, яко таковыи имамаи учителяи и молитвенники, прославляем вас, глаголюще: Радуйтесь, истинныи веры исповедницы; Радуйтесь, Царствия Божия наследницы. Радуйтесь, ереси иконоборныи обличителие; Радуйтесь, иудейства посрамителие. Радуйтесь, триязычную ересь поправшии; Радуйтесь, словеном двери Царствия Небеснаго отверзшии. Радуйтесь, воины Христови, еще в житии от Него славою венчаннии; Радуйтесь, и в славе своей дух смиренномудрия соблюдошии. Радуйтесь, злая, яко Исаия и Иеремия, от единоплеменных за благая приявшии; Радуйтесь, яко Даниил и Есфирь, за язык свой ходатайствовавшии. Радуйтесь, со всеми святыми немерцающим светом осияваемии; Радуйтесь, со всеми угодниками Божии о нас грешных Господу молящиися. Радуйтесь, Мефодие и Кирилле, язык словенских апостоли и богомудрии учителяе.

### **Кондак 10**

Спасти хотя новое стадо Христово от волков мысленных, святой Мефодий на одре смертном ученики своя вельми моляще твердо стояти во истинней вере, ниже козней вражеских устрашати, но и в скорбех и напастех за вся благодарити Бога, поюще: Аллилуиа.

### **Икос 10**

Стена есте всем, о православии трудящимся, и заступление к вам с верою притекающим, Мефодие и Кирилле богомудрии, ибо небесе и земли Творец избра вас быти на земли ловцы человеком, послежде же на небесех к лику апостол сопричте. Темже и нам умолите благодати Его даром податися, умиленно вопиющим таковая: Радуйтесь, добродетельми, яко виссоном, украшеннии; Радуйтесь, в премудрости с Соломоном сравнившиися. Радуйтесь, воздержанием и молитвою великим Антонию и Пахомию уподобльшиися; Радуйтесь, яко Великий Василий и Иоанн Златоустый, силою слова одареннии. Радуйтесь, яко целомудрием Иосифу подобни бысте; Радуйтесь, терпению Иовлему подражавшии. Радуйтесь, незлобием царю и пророку Давиду соревновавшии; Радуйтесь, ревностию по вере Илии уподобившиися. Радуйтесь, яко, подобно Павлу и Иоанну Богослову, Христа Бога возлюбили есте; Радуйтесь, яко Даниил и трие отроцы, мужественно Бога прославившии. Радуйтесь, яко ангелом и святым Божиим сожительствуете; Радуйтесь, яко и мы грешнии имя ваше с верою призываем. Радуйтесь, Мефодие и Кирилле, язык словенских апостоли и богомудрии учителяие.

### **Кондак 11**

Пение благодарное приносяще ко Господу, предстателие нам грешным вас даровавшему, со умилением молим вы, святии учителяие наши, не возгнушати нас лености ради нашея, ниже отступити от нас тяжких ради беззаконий наших, но милосердие от Господа всем испросити, вопиющим Ему о вас: Аллилуиа.

### **Икос 11**

Светозарную апостол словенских двоицу восхваляюще, вернии, устранимся своих распрей в раздоров, паче же разделений в вере, единение же духа в союзе мира блюдуще, воспоим святых учителей тако: Радуйтесь, громогласныя трубы Евангельскаго благовестия; Радуйтесь, гусли сладкозвучныя проповеди спасения. Радуйтесь, крепцыи правды насадителие; Радуйтесь, непоколебимии неправды истребителие. Радуйтесь, радости податели всем бывшии; Радуйтесь, скорбей нападения отвсюду восприявшии. Радуйтесь, мзды и

воздаяний трудом своим от человек не искавши; Радуйтесь, о неблагодарных людех Богу молившиися. Радуйтесь, ангел Божиих и святых Его подвиги и добродетельми своими радовавши; Радуйтесь, радости вечныя купно с ними во обителях блаженных наслаждении. Радуйтесь, звезды, светом истины сияющия; Радуйтесь, сами добродетелей ваших светом осиянии. Радуйтесь, Мефодие и Кирилле, язык словенских апостоли и богомудрии учителяе.

### **Кондак 12**

Благодать единения и мира испросите нам, преподобнии, и мир во всем мире до конца мирскаго жития вашего благовестившии, яко да и мы, от всех расколов и искушений свободшесе, в мире воспоим, яко други, вас возлюбившему единому миротворцу всех Господу: Аллилуиа.

### **Икос 12**

Поюще ваше дивное житие на земли и славу, яже на небеси, помышляюще, смиренно молим вас, святии учителяе, силу свыше православным христианом на враги невидимыя и видимыя даровавшия, и народы словенския в единение веры приведшия, вси воспевают, верно взывающе: Радуйтесь, православия твердое ограждение; Радуйтесь, неверия живое обличение. Радуйтесь, исхождение Духа Святаго от Отца точию, яко отдревле прияхом, исповедавшии; Радуйтесь, службу Божию совершати комуждо своим си языком завещавшии. Радуйтесь, праведных в праведности утверждение; Радуйтесь, и беззаконных к закону обращение. Радуйтесь, яко вами и мы во исполнение Церкви внидохом; Радуйтесь, яко вами слово Божие на сроднем нам языке достиже. Радуйтесь, яко молитвами вашими, аки забралом крепким, от врагов наших ограждаемса; Радуйтесь, яко предстательством вашим вечныя жизни сподобляемса. Радуйтесь, всем словеном пастырие и отцы, ихже ради есмы вси братие; Радуйтесь, яко вас ради братия суще по плоти и по духу братия Христу сотворихомса. Радуйтесь, Мефодие и Кирилле, язык словенских апостоли и богомудрии учителяе.

### **Кондак 13**

О пречуднии и предивнии язык словенских учителяе, святии равноапостольнии Мефодие и Кирилле, нынешнее приемше моление наше, вся словены от находящих им зол и бед свободите, в мире и единении соблюдайте и к Царствию Небесному предстательством вашим приведите всех, во умилении о вас поющих Богу: Аллилуиа.

(Этот кондак читается трижды, затем икос 1 и кондак 1)